



唐詩紀事卷第二十八

張濯

孫叔向

朱長文

胡令能

鄭丹

李希仲

杜誦

鄭錫

古之奇

秦系

令狐岷

楊凌

劉太真

顧况

薛業

劉希戩

朱絳

元凜

楊志堅

劉方平

李揆

戎昱

張濯

題舜廟云古都遺廟出山濱萬代千秋仰聖君蒲坂城邊長逝水蒼梧野外不歸雲寥寥象設魂應老寂寂虞

篇德已聞向晚風吹庭下栢猶疑琴曲韻南薰
濯登上元進士第

孫叔向

題昭應溫泉云一道溫泉遶御樓先皇曾向此中遊雖
然水是無情物也到宮前咽不流

送咸安公主云鹵簿遲遲出國門漢家公主嫁烏孫玉
顏便向穹廬去衛霍空承明主恩咸安德宗女元和時
追封燕國襄穆公主

朱長文

吳興送梁補闕歸朝賦得荻花云柳家汀洲孟冬月雲

寒水清荻花發一枝持贈朝天人願比蓬萊殿前雪

春眺揚州西崗寄於員外云蕪城西眺極蒼流漠漠昏
煙間曙樓瓜步早潮吞建業蒜山晴雪照揚州

望中有懷云龍向洞中銜雨出鳥從花裏帶香飛白雲
斷處見明月黃葉落時聞擣衣

宿新安江深渡館寄鄭州王使君云霜飛十月中搖落
衆山空孤館閉寒木大江生夜風賦詩忙有意沈約在
關東

送李司直歸浙東幕兼寄鮑將軍云翩翩書記早曾聞
二十年來願見君今日朝廷思白髮同時幾許在青雲

人從北固山邊去水到西陵渡口分會作王門曳裾客
為余前謝鮑將軍對節度大夫初
長文大曆間江南詩人

胡令能

詠繡障云日暮堂前花蓋嬌爭拈小筆上床描繡成安
向春園裏引得黃鶯下柳條

小兒垂釣云蓬頭稚子學垂綸側坐莓苔草映身路人
借問遙招手恐畏魚驚不應人

喜莆田韓少府見訪云忽聞梅福來相訪笑著荷衣出
草堂兒童不慣見車馬爭入蘆花深處藏

令能莆田隱者少為員局鍤釘之業以所居列子之里
家貧遇茶果必祭列子以求聰明或夢人割其腹以一
卷書內之遂能吟詠禪學尤邃世謂胡釘鉸者也貞元
元和間人

鄭丹

肅宗挽歌云國以重明受天從諒閣移諸侯方北面白
日又西馳龍影當泉落鴻名向廟垂永言青史上還見
載無為玄宗挽歌云律曆千年會車書萬里同固期常
載物豈意厭觀風地慘新疆理域摧舊戰功山河萬古
在今夕盡歸空高仲武云鄭丹詩剪刻婉密寶應中獻

二帝兩后挽歌三十首詞旨哀楚得臣子之致雖不及
事朝廷嘉之解褐蘄州錄事參軍二章其尤者也
丹大曆間詩人

李希仲

東皇太一詞云吉日初齋戒靈巫穆上皇焚香布瑤席
鳴珮奠椒漿緩舞花飛滿清歌水去長迴波送神曲雲
雨滿瀟湘

薊北行云旄頭有精芒胡騎獵秋草羽檄南渡河邊庭
用兵早漢家愛征戰宿將今已老辛苦羽林兒從戎榆
關道一身救邊速烽火通薊門前軍飛鳥斷格鬪塵沙

昏寒日鼓聲急單于夜將奔當須狗忠義身死報國恩
高仲武云希仲華勝於質此所謂才力不足務爲清淺
者也然前軍飛鳥斷格鬪塵沙昏亦出塞實錄疊疊不
歇可及中矣

淮
希仲趙郡人天寶初宰偃師范陽兆戎孳家避亂入江

杜誦

誦哭長孫侍御玄云道爲謀猷重名因賦頌雄禮鬪曾
擢桂憲府既東驄流水生涯盡浮雲世事空惟應舊松
栢蕭瑟九原中

亦載杜陵集中

高仲武云誦詩平調不失文流如流水生涯盡浮雲世
事空得生人始終之理故編於集
誦大曆間詩人也

鄭錫

邯鄲少年行云霞鞍金口騮豹袖紫貂裘家住叢臺下
門前漳水流喚人呈楚舞借客試吳鉤見說秦兵至甘
心赴國讐

李嘉祐與錫遊春詩云東門垂柳長回首獨心傷日暖
臨芳草天晴憶故鄉
蝶花鶯上下過水蝶悠颺借問同行客今朝淚幾行李端司空曙皆錫友也

錫登寶應進士第寶曆間為禮部員外郎

事見李翱所撰李長史墓誌

古之奇

秦人謠云微生祖龍代却思堯舜道何人仕帝庭
拔發指佞草姦臣弄民柄天子恣衷抱上下一相蒙
馬鹿遂顛倒中國既版蕩骨肉安可保人生貴年壽
吾恨死不早

李端送之奇赴京州幕云疇昔十年兄相逢五校營今

宵舉杯酒隴月見軍城

時從馬僕射醉

之奇登寶應進士第

秦系

系呈韋蘇州詩云久卧雲間已息機青袍忽著狎鷗飛
詩興到來無一事郡人今有謝元暉

系字公緒會稽人隱泉州南安九日山張建封聞系不
可致就加校書郎自號東海釣客與劉長卿善權德輿
曰長卿自以爲五言長城系用偏師攻之矣韋荅系云
知掩山扉三十秋魚鬚翠碧棄床頭莫道謝公方在郡
五言今日爲君休蓋系以五言得名久矣年八十餘卒
南安人號其峯爲高士峯

系將移耶溪舊居留呈嚴長史陳校書允初云鷄犬漁
舟裡長謠任興行即今邀客醉已被遠山迎書笈將非

重荷衣著甚輕謝安無箇事急起爲蒼生

山中贈張評事時授右衛佐云終年常避喧自注五千
言流水閑過院春風與閉門山茶邀上客桂實落前軒
何事教予起微官不足論

系家剡山向隱一紀大曆五年人或以其文聞於留守
薛公無何奏系右衛率府倉叅軍意所不欲以疾辭免
因將命者獻詩云由來那敢議輕肥散髮行歌自採薇
逋客未能忘野興辟書令遣脫荷衣家中匹婦空相笑
池上群鷗盡欲飛更乞大賢容小隱益看愚谷有光輝
系曾與鮑員外同舉場因其見尋呈情云少小爲儒不

自強如今嬾復見侯王覽鏡自知身漸老買山將作計
偏長荒涼鳥獸同三徑撩亂琴書共一床猶有郎官來
問病時人莫道我佯狂

山中寄錢起苗發云空山歲計是胡麻江海無梁泛一
槎幼子唯能覓初粟逸妻相共老煙霞高吟麗句驚巢
鶴閑閉春風看落花借問郡中何水部今人幾箇屬詩
家

令孤峘

儒服學從政遂爲塵事嬰銜命東復西孰堪異鄉情懷
綠且懷息策名敢逃名羨彼農畝人白首親友并江山

入秋氣草木彫晚榮方塘寒露凝旅館寒飈生懿交守
東吳夢想聞頌聲雲水方浩浩離憂何時平右令孤峘
寄韋蘇州詩峘德棻五世孫天寶末進士宰相楊炎故
出杜鴻漸門下其子封求弘文生以託峘峘曰必得公
手書得書即奏之炎具奏所以然德宗曰姦人也自禮
侍貶衡州別駕峘介懷人與爲怨韋蘇州答峘詩云一凶乃一
吉一是復一非孰能逃斯理亮在識其微三黜故無愠
高賢當庶幾但以親交戀音容邈難希况惜別離久但
忻藩守歸期宴芳陪厠山川又乖違吳門冒海霧峽路
凌連磯同會在京國相望涕沾衣明時重英才當復列

彤闈白玉雖塵垢拂拭還光輝
垣再謫三衢遇田敦爲牧乃門生也相見敦曰吾今日
方見座主乃分半俸奉之

楊凌

淮陽爲郡暇坐惜流芳歇散懷累榭風清暑澄潭月陪
燕辭三楚戒途綿百越非當遠別離雅奏何由發右楊
凌詩常應物刺滁州凌時以協律客滁州既別韋寄詩
云吏散山閣掩鳥鳴山郡中遠念長江別俯覺坐隅空
舟泊南池雨簟捲北樓風併罷芳罇燕爲愴昨時同故
凌以前詩謝之

凌明妃怨云漢國明妃去不還馬馳絃管向陰山匣中
縱有菱花鏡羞對單于照舊顏
凌字恭履最善文章大曆中與兄憑凝踵進士第時號
三楊凌終侍御史子敬之

劉太真

寵至乃不驚罪及非無由奔迸歷畏途緬邈赴偏陬牧
此彫弊毗屬當賦斂秋夙興諒無補旬暇焉敢休前日
懷友生獨登城上樓迢迢西北望遠思不可收今日車
騎來曠然銷人憂晨迎東齋飯晚渡南溪遊以我碧流
水泊君青翰舟莫將遷客程不爲勝景留飛札謝三守

斯篇希見酬右劉太真詩太真刺信州時顧十二左遷
過上饒出韋蘇州房杭州韋睦州三使君詩太真繼焉
太真宣州人師蕭穎士蕭云太真吾入室者也貞元四
年德宗詔群臣宴曲江自爲詩群臣皆和帝自第之以
太真李紆等爲上鮑防于邵等次之張濛等爲下與擇
者四十二人韋蘇州荅太真詩云瓊樹凌霜雪葱蒨如
芳春英賢雖出守本自玉階人宿昔陪郎署出入仰清
塵孰云俱列郡比德豈爲隣其見重如此

顧况

况字逋翁姑蘇人至德進士性詼諧與柳渾李泌爲方
外友德宗時渾輔政以祕書郎召及泌相自謂當得遷
官久之遷著作郎况坐詩語調譎貶饒州司戶居於茅
山以壽終皇甫湜爲况文集序云偏於逸歌長句駿發
踔厲往往若穿天心出月脇意外驚人語非尋常所能
及最爲快也其爲人類其詞章云

况志尚踈逸近於方外時宰相招以好官况以詩荅云四
海如今已太平相公何用喚狂生此生還似籠中鶴東
望瀛洲叫一聲

上柳相公

子規詩云棲霞山中子規鳥口邊血出啼不了山僧夜
後初入定聞似不聞山月曉

露青竹杖歌云鮮于仲通正當年章仇兼瓊在蜀川約
束蜀兒採馬鞭蜀兒採鞭不敢眠橫截斜度飛鳥邊繩
橋夜上層崖巔頭挿白雲跨飛泉採得馬鞭長且堅浮
漚丁子珠聯聯灰煑蠟揩光爛然章仇兼瓊持天上
天雨露何其偏飛龍閣旣馬數千朝飲吳江夕秣燕紅
塵撲轡汗濕羈師子麒麟聊比肩曲江昆明洗刷牽四
蹄蹋浪頭拚天蛟龍藉頽河伯虔拓羯胡雛脚手鮮陳
閔韓幹丹青妍欲貌未貌眼欲穿金鞍玉勒錦連乾騎
入桃花揚柳烟十二樓中奏管絃樓中美人奪神仙爭
愛大家把此鞭祿山入關關破年忽見揚州北邸前紙

有人還一千錢亭亭筆直無皺節磨將形相一條鐵市
頭終是無人別江海賤臣不拘縵垂綃挂影西窓缺雅
子覓衣挑仰穴家僮拾薪幾拗折玉潤猶霑玉壘雪碧
蘇似染萇弘血蜀帝祠邊子規咽相如橋上文君絕徃
年策馬降至尊七盤九折橫劔門穆王八駿起崑崙安
用冉冉孤生根聖人不貴難得貨金玉珊瑚誰買恩
况嘗攻小筆求知心亭監人詰之曰余要貌海中山耳
仍辟畫省王默爲副任職半年落筆有竒趣
山中作云野人愛向山中宿况在葛洪丹井西庭前有
箇長松樹半夜子規來上帝况又有汀洲渺渺江灘短

疑是疑非兩斷腸
句巫峽朝雲暮不歸
洞庭春水晴空滿
句顏垣化爲陂
陸地堪乘舟
句大姑山盡小姑出
月照洞庭行客舫
句右張爲取作主客圖

代佳人贈別云
萬里行人欲渡溪
千行珠淚滴爲泥
已成殘夢隨君去
猶有驚鳥半夜啼

秋題葉道士山房云
水邊垂柳赤欄橋
洞裏仙人碧玉簫
近得麻姑書信否
潯湯向上不通潮

金璫玉珮歌云
贈君金璫太霄之玉珮
金鎖禹步之流珠
五嶽真君之祕錄
九天丈人之寶書
東井沐浴辰已畢
先進洞房上奔日
借問君從何處來
黃姑織女機邊出

悲歌三首并序云
情思發動聖賢所不免也
故師乙陳其宜
延陵審其音理
亂之所經王化之所興
信無外聲豈徒文彩之麗
遂作歌以悲之云
邊城路今人犁田昔人墓
崖上沙昔時江水今人家
今人昔人共長歎
四氣相摧節迴換
明月皎皎入華池
白雲離離渡霄漢
我欲昇天天隔霄
我欲渡水水無橋
我欲上山山路險
我欲汲井井泉遙
越人翠被今何夕
獨立沙邊江草碧
紫燕西飛欲寄書
白雲何處蓬萊客
又云新繫青絲百尺繩
心在君家轆轤上
我心皎潔君不知
轆轤一轉一惆悵
何處春風吹曉幕
江南淥水通朱閣
美人二八顏如花

泣向春風畏花落臨春風聽春鳥別時多見時少愁人
一夜不得眠瑤井玉繩相對曉又云軒轅黃帝初得仙
鼎湖一去二千年周流三十六洞天洞中日月星辰聯
騎龍倒景遊八極軒轅弓劍無人識東海青童寄消息
八月五日歌云四月八日明星出摩耶夫人降前佛八
月五日佳氣新昭成太后生聖人開元九年燕公說奉
詔聽置千秋節丹青廟裡貯姚宋花萼樓中宴岐薛清
樂靈香幾處聞鸞歌鳳吹動祥雲已於武庫見靈鷲仍
向晉山逢老君率土溥天無不樂河清海晏窮寥廓梨
園弟子傳法曲張果先生進仙藥玉座淒涼遊帝京悲
翁回首望承明雲韶九奏杳然遠唯有五陵松柏聲
洞庭秋日云青草湖邊日影低黃茅嶂裏鷓鴣啼丈夫
飄蕩今如此一曲狂歌楚水西

薛業

洪州客舍寄柳博士芳詩云去年燕巢主人屋今年花
發路傍枝年年爲客不到舍舊國存亡那得知胡塵一
起天下亂何處春風無別離

贈張折衝詩云都尉今無事時清但閉關夜霜戎馬瘦
秋草射鵬閑位以穿楊得名因折桂還馮唐真不遇嘆
息鬢毛班

獨孤常州送薛處士業遊廬山序云薛侯敦於詩困於學敏於行時然後言言而寡尤口弗言祿祿亦不及識其真者以爲永嘆而薛侯居之澹如君子哉若人也拂纓上之塵西遊廬山趙補闕驛王侍御定張評事有略各以文爲贈余亦持片言用代踈麻瑤華之贈

劉希戩

彈琴詩云碧山本岑寂素琴何清幽彈爲風入松崖谷
庭以秋庭鶴舞白雪泉魚躍洪流余欲娛世人明月難
暗投感嘆未終曲淚下不可收嗚呼鍾子期零落歸山
丘死而若有知魂兮從我遊

朱絳

秦女怨云獨坐紗窓刺繡遲紫荆枝上轉黃鸝欲知無
限傷春意併在停針不語時顧陶取此詩爲類選

元凜

九日對酒云嘉辰復遇登高臺良朋笑語傾金壘煙攤
秋色正堪翫風惹菊香無限來未保亂離今日後且謀
權洽玉山頽誰知靖節當時事空學狂歌倒載迴
中秋夜不見月云蟾輪何事色全微賺得佳人出綉幃
四野霧凝空寂寞九霄雲鎖絕光輝吟詩得句翻停筆
翫處臨樽却掩扉公子倚欄猶悵望懶將紅燭草堂歸

揚志堅

顏魯公爲臨川內史邑有揚志堅者嗜學而貧妻厭之
一日告離志堅以詩送之曰平生志業在琴詩頭上如
吟有二絲漁父尚知溪谷暗山妻不信出身遲荆釵任
意撩新鬢明鏡從他別畫眉今日便同行路客相逢即
是下山時持詩詣州請公牒求別醮顏公案其妻曰王
之康既虛豈歡黃卷朱叟之妻必去寧見錦衣污辱
鄉閭敗傷風俗若無褒貶僥倖者多遂箠之後無棄其
夫者

劉方平

秋夜泛舟云林塘夜沉舟虫響荻颼颼萬影皆因月千
聲各爲秋歲華空復晚鄉思不堪愁西北浮雲外伊川
何處流

皇甫冉寄方平詩云十年不出溪林中一朝結束甘從
戎嚴子持竿心寂歷寥落荒籬遮舊宅又曰與君從來
同語默豈是悠悠但相識天畔三秋空復情袖中一字
無由得

方平春怨云紗窓日落漸黃昏金屋無人見淚痕寂寞
空庭春又晚梨花滿地不開門
方平泛舟思鄉云西北浮雲外伊川何處流蓋洛中人

也皇甫冉之京留別方平詩云遲遲越二陵回首但蒼
茫喬木清宿雨故關愁夕陽冉嘗爲河南從事自是遷
左拾遺留別於河南也

方平與元魯山善不仕蓋邢襄公政會之後也蕭穎士
云山東茂異有河南劉方平

李揆

揆興饒州刺史封漸仲容叔霽連句揆筆力道媚有免
相踐蓬閣卧病淮海濱偶逢潘川守宛是潘陽親又云
共仰新侯伯同瞻舊宰相又云鄉路轅思北家林卷喜
南出江鄰
樂雜志

前定錄云有巫者告揆曰公當拾遺遺以一書緘之
云得此官即開後明皇召試紫絲盛露囊賦果得拾遺
啓緘即此賦也

戎昱

憲宗朝北狄頻寇邊大臣奏議古者和親有五利而無
千金之費帝曰比聞有士子能爲詩而姓名稍僻是誰
宰相對以包子虛冷朝陽皆非也帝遂吟曰山上青松
陌上塵雲泥豈合得相親世路盡嫌良馬瘦唯君不棄
卧龍貧千金未必能移性一諾從來許殺身莫道書生
無感激寸心還是報恩人侍臣對曰此是戎昱詩也京

北尹李鑾擬以女嫁昱令其改姓昱固辭焉帝悅曰朕
又記得詠史一篇云漢家青史內計拙是和親社稷因
明主安危託婦人豈能將玉貌便欲靜胡塵地下千年
骨誰爲輔佐臣帝笑曰魏絳之功何其懦也大臣遂思
和戎之論矣

塞上曲云樓上畫角哀即知兵心苦試問左右人無言
淚如雨何意休明時終年事鼙鼓

長安秋夕云八月更漏長愁人起常早閉門寂無事滿
地生秋草昨宵西窓夢先入荆門道遠客歸去來在家
貧亦好

昱在零陵于襄陽聞有妓善歌取之昱以詩遣行曰寶
鈿香嫩翡翠裙粧成掩泣欲行雲慙慙好取襄王意莫
向陽臺夢使君子遂遣還昱登進士第衛伯玉鎮荆南
辟爲從事後爲辰虔二州刺史

昱贈別張駙馬云上元年中長安陌見君朝下欲歸宅
飛龍駙馬三十疋玉勒雕鞍照初日數里衣香遙撲人
長衢兩歇無纖塵從奴斜抱敕賜錦雙雙蹙出金麒麟
天子愛婿皇后弟獨步明時負權勢一身扈蹕承殊澤
甲第朱門聳高戟鳳凰樓上伴吹簫鸚鵡盃中醉留客
泰去否來何足論宮中晏駕人事翻一朝負遣辭丹闕

五年待罪湘江源冠冕凄凉幾遷改眼看桑田變成海
華堂金屋別賜人細眼黃頭總何在清宮相見寸心悲
懶欲今時問昔時看君風骨殊未歇不用愁來雙淚垂

肅宗張皇后弟清潛尚大寧延和二郡
公主代宗立廢后為庶人清潛皆流放

寶應中過滑州洛陽後同王季友作苦哉行詩云妾家
清河邊七葉承貂蟬身為冢小女偏得渾家憐親戚不
相識幽閨十五年有時最遠出祇到中門前前年狂胡
來懼死翻生全今秋官軍至豈意遭戈鋌匈奴為先鋒
長鼻黃髮拳彎弓獵生人百步牛羊羶脫身落虎口不
及歸黃泉苦哉難重陳暗哭蒼蒼天

採蓮曲云雖聽採蓮曲詎識採蓮心漾槳愛花遠回舡
愁浪深煙生極浦色日落半江陰同侶憐波靜看粧墮
玉簪又云涇陽女兒花滿頭麋麋同泛木蘭舟秋風日
暮南湖裏爭唱菱歌不肯休

唐詩紀事卷第二十八

唐詩紀事卷第二十九

常袞

張衆甫

田登

柳郴

李彥遠

薛昇

元載

張元宗

楊郇伯

高拯

梁鎰

劉長川

姚倫

孫處立

劉復

宋彬

戴叔倫

于鵠

王季文

常袞

晚秋集賢院即事寄徐薛二侍郎云穆穆上清居沉沉
中秘書金鋪深內殿石甃淨寒深花樹臺斜倚宮煙閣
半虛縹囊鋪錦繡翠軸卷瓊琚墨潤水文繭香消蠹字

魚翻黃桐葉老吐白桂花初舊德雙遊處聯芳十載餘
北朝榮庾薛西漢盛嚴徐侍講親華衣徵詩步綺疏綴
簾金翡翠賜硯玉蟾蜍移秩東南遠離憂歲月除承明
期重入江海意何如

袞京兆人爲中書舍人文采贍蔚長於應用譽重一時
相代宗用人非文詞者擯不用世謂之齜伯

袞晚秋夕集賢即事詩司空曙和云藹藹鳳凰宮蘭臺
玉樹通夜霜凝柎羽晚日照和風宮亞三台貴儒閣百
氏宗司言陳禹拜侍講發堯聰香卷青蒲內鉉刀綠字
中綴籤從太史鏘珮揖群公池接天泉碧林交玉果紅

寒龜登故葉秋蝶戀踈叢顏謝徵文並鍾裴直事同離
群驚海鶴屬思怨江楓地遠姑蘇外山長越絕東漸當
哲匠後下曲奏難工獨孤及和云漢家金馬署帝座紫
微郎圖籍凌群玉歌詩冠栢深陰陰萬年樹肅肅五經
堂揮翰忘朝食研精待夕陽晴空露盤迥秋月鎖窓涼
遠興生班鬢高情寄縹囊葳蕤雙鸞驚夙昔並翱翔汲
冢同刊謬蓬山共補亡差池摧羽翮流落限江湘禁省
一分袂昊天三兩霜石渠遺跡滿水國暮雲長早晚朝
宣室歸時道路光錢起和云文星垂太虛辭伯綜群書
綵筆下鴛掖褒衣來石渠典墳探奧旨造化觀權輿述

聖魯宣父通經漢仲舒窓明宜縹帶地肅近丹除清晝
刪詩暇高秋作賦初露盤侵漢籥宮柳度鴉踈靜對連
雲閣晴聞過闕車舊僚云出矣晚歲復何如海嶠瞻歸
路江城夢直廬含毫思兩鳳望遠寄雙魚定笑巴歌拙
還參麗曲餘

張衆甫

鶴詩云馴狎經時久離襟短翮存不隨淮海變空媿稻
梁恩獨立秋天淨單棲夕露繁欲飛還斂翼誰敢望乘
軒

戴叔倫酬衆甫詩云野人無本意散木任天材分向空
山老何言上苑來迢迢千里道依倚九層臺出處寧知
命輪轅豈自媒更慚張處士相與別蒿萊

衆甫送李觀之宣州謁袁中丞詩云古渡大江濱西南
據要津自當舟楫路應齊往來人翻浪驚飛鳥迴風起
綠蘋君看波上客晚歲獨垂綸

高仲武云衆甫婉媚綺錯巧用文字工於興喻只如不
隨淮海變空媿稻梁恩蓋陳謝之源又自當舟楫路應
濟往來人得諷興之要形容體裁率皆如此文流之佳
士也

衆甫字千初清河人年過耳順方脫章甫冠惠文爲太

常寺太祝尉河南壽安縣罷秩僑居雲陽時以緣情比興疏導心術志之所之輒詣絕境後拜監察御史為淮寧軍從事建中三年卒

權載之誌其墓

田登

成都為客作詩云蜀郡將知遠城南萬里橋衣緣鄉淚濕貌以客愁銷地富魚為米山芳桂是樵旅遊唯得酒今日過明朝

登大曆天寶間人杜子美贈獻納史起居田舍人詩即登也末句云揚雄更有河東賦惟待吹噓送上天蓋登以舍人奉使入蜀肅宗時人也

柳柳

柳與李端盧綸友善有賊平後送客還鄉詩云他鄉生白髮舊國有青山最取有思致尤長於短句如贈別云江浦程千里離樽淚數行無論吳與楚俱是客他鄉又云何處最悲辛長亭臨古津往來舟楫路前後有離人

李彥遠

採桑云採桑畏日高不待春眠足攀條有餘愁那矜貌如玉千金豈不贈五馬空躑躅何以變貞性幽篁雪中綠彥遠大曆正元間詩人

薛紆

勅贈康尚書美人云天門喜氣曉氛氲聖主臨軒召冠
軍欲令從此行霖雨先賜巫山一片雲康尚書曰知也
德宗時斬李惟岳以功擢爲深趙節度遷奉誠軍陟晉
絳尋德宗時河東詩人也

元載

王忠嗣鎮北京以女韞秀歸元載歲久而見輕韞秀勸
之遊學元乃遊秦爲詩別韞秀曰年來誰不厭龍鍾雖
在侯門似不容看取海山寒翠樹苦遭霜霰到秦封妻
請偕行曰路掃饑寒跡天哀志氣人休零別離淚携手
入西秦

元到京屢陳時務深符上旨肅宗擢拜中書王寄諸姪
妹詩曰相闥已隨麟閣貴家風第一右丞詩笄年解笑
鳴機婦耻見蘇秦富貴時元肅代兩朝宰相貴盛無比
復爲一篇以喻之曰楚竹燕歌動畫梁春蘭重換舞衣
衣公孫開館招佳客知道浮雲不久長

元貪恠被誅上令王氏入宮歎曰二十年太原節度使
女十六年宰相妻誰能爲長信昭陽之事死亦幸矣京
兆宮斃

大曆五年春載早朝有獻文章者公令左右收之其人
苦欲公讀公云候入中書當爲看其人言若不能讀自

誦畢因亦不見詩曰城東城西舊行處城裏花飛亂如
絮海燕啣泥欲下來屋裏無人却飛去載後破家妻子
被殺其一云城南路長無宿處荻花紛紛如柳絮海燕
啣泥欲作巢空室無人却飛去

張元宗

登景雲寺閣云胡馬飲河洛我家從此遷今來獨垂淚
三十六峯前
望終南山云紅塵白日長安路馬足車輪不暫閑唯有
茂陵多病客每來高處望南山

楊郇伯

妓人出家云盡出花鈿與四隣雲鬟剪落厭殘春暫
風燭難留世便是蓮花不染身貝葉欲翻迷錦字梵聲
初學誤梁塵從今艷色歸空後湘浦應無解佩人
寶常途中立春寄懷郇伯云浪跡終年客驚心此地春
風前獨去馬澤畔耦耕人老大交情重悲涼物外親子
雲今在宅應見柳條新

高拯

拯及第後贈試官云公子求賢未識真欲將毛遂比常
倫當時不及三千客今日何如十九人
拯大曆十三年進士試官薛邕也

梁銍

七夕沉舟云雲端有靈匹掩映拂粧臺夜久應搖珮天
高響不來片歡秋始展殘夢曉翻催却怨填河鵲留橋
又不回

詠木老人云刻木牽絲作老翁鷄皮鶴髮與真同須臾
弄罷寂無事還似人生一夢中

古意云妾家巫峽陽羅幌寢銀床曉日臨窓久春風引
夢長落釵仍在鬢微汗欲消香縱使蒙籠覺魂猶逐楚
王

錢起秋夜與銍文宴云車到閑林下林香蕙草時好風

能自至明月不須期秋水翻荷影晴雲脆柳絲微宮是
底物許日廢言詩

明皇雜錄云李輔國矯制遷明皇西宮高力士竄嶺表
帝戚戚不樂日一蔬食吟詩云刻木牽絲作老翁至一
夢中不知明皇作或詠銍詩也

劉長川

寶劍篇云寶劍不可得相逢幾許難今朝一度見赤色
照人寒匣裏星文動環邊月影殘自然神鬼伏無事莫
空彈將赴東都上李相公云四海兵初偃平津閣正開
誰知大爐下還有不然灰

長川肅代時詩人也

姚倫

感秋云試向踈林望方知節候殊亂聲千葉下寒影一
巢孤不蔽秋天鴈驚飛夜月烏霜風與春日幾度遣榮
枯

倫過章秀才洛陽客舍云達人心自適旅舍當閑居不
出來時徑猶看讀了書晚山嵐色近斜日樹陰踈盡是
忘言客聽君誦子虛

高仲武云姚子詩雖未洪深去凡已遠屬興比事不失
文流如亂聲千葉下寒影一巢孤亦篇章之秀也

倫終揚州大都府曹參軍

孫處立

詠黃鶯云欲轉聲猶澁輕飛羽未調高風不借便何處
得遷喬

處立江寧人長安中為左拾遺善屬文嘗恨天下無書
以廣新聞龍神初桓彥範等用事處立遺書論時事得
失不用乃去官還鄉以病卒

劉復

寺居清晨云高枕對曉月衣巾清且涼露華朝未晞滴
瀝含虛光隔竹聞汲井開扇見焚香幽心感衰病結念

依法王青冥早雲飛杳眇空鳥翔此情皆有釋悠然知所忘

經禁城云日沒路且長遊子欲涕零荒城無人路秋草飛寒螢東南古丘墟莽蒼馳郊垆黃雲晦斷岸枯井臨崩亭昔人竟何之窮泉獨冥冥蒼苔沒碑版朽骨無精靈俛仰寄世間忽如流波萍金石非汝壽浮生等臊腥不如學神仙服食求丹經

遊仙云稅駕倚扶桑逍遙望九州二老佐軒轅移戈戮蚩尤功成棄之去乘龍上天遊天上見玉皇壽與天地休俯視崑崙宮五城十二樓王母何窈眇玉質清且柔

揚袂折瓊芳寄我天東頭相思千萬歲大運浩悠悠安用知吾道日月不能周寄音青鳥翼謝爾碧海流

送王倫詩云春天日未曛楚客酣送君翩翩孤黃鶴萬里滄洲雲四方各有心豈得常顧群山連巴湘遠水與荆吳分清光日阻修尺素安可論相思寄夢寐瑶草空氛氲

出三城別幕中三判官詩云翔禽託高柯倦客念主人恩義有所委四海同一身况皆廣大姿翰音見良辰陳規佐武畧高統據要津常願投素誠今果得所申金壘列四座廣廈無氛塵留連徂暑中觀望歷數旬河山險

以固士卒勇且仁飾裝去未歸相追越城闔愧無青玉
案緘佩永不泯

復登大曆進士第嘗為水部外郎為石洪父平墓銘

朱彬

丹陽作云暫入新豐市猶聞舊酒香抱琴沽一醉盡日
卧垂楊

彬大曆正元間詩人

戴叔倫

字幼公潤州人師事蕭穎士為門人冠劉晏管鹽鐵表
主管湖南至雲安楊惠琳反馳客劫之曰歸我金幣可

緩死叔倫曰身可殺財不可得乃捨之累遷至容管經
略德宗嘗賦中和節詩遣使者寵賜代還卒早行寄朱
山人放云山曉旅人去天高秋氣悲明河川上沒芳草
露中衰此別又萬里少年能幾時心知剡溪路聊且寄
前期

和汴州李相公勉人日喜春云年來日日春光好今日
春光好更新獨獻菜羹憐應節遍傳金勝喜逢人煙添
柳色看猶淺鳥踏楊花落已頻東閣此時聞一曲翻令
和者不勝春

高仲武云叔倫為人溫雅善舉止無賢不肖見皆盡心

在租庸幕數年夕惕靡怠吏部尚書劉公與禮部員外
張繼書云博訪選材揖對賓客如戴叔倫其見推稱如
此詩體雖不中越格然解宇經山火公田沒海潮亦指
事造形之工者其骨氣稍輕故詩亦少

吳明府自遠來留宿云出門逢故友衣服滿塵埃歲月
不可問山川何處來倚城容弊宅散職寄靈臺自此留
君醉相歡得幾迴

除夜宿石頭驛云旅館誰相問寒燈獨可親一年將盡
夜萬里未歸人寥落悲前事支離笑此身愁顏與衰鬢
明日又逢春

客舍與故人偶集云天秋月又滿城闕夜千重還作江
南會翻疑夢裏逢風枝驚暗鵲露草覆寒蛩羈旅長堪
醉相留畏曉鍾

送友人東歸云萬里楊柳色出關逢故人輕煙拂流水
落日照行塵積夢江湖濶憶家兄弟貧徘徊灞亭上不
語自傷春

姚合取爲
極玄集

送謝夷甫宰鄮縣云君去方爲縣干戈尚未銷邑中殘
老小亂後少官僚解宇經山火公田沒海潮致時應變
俗新政滿餘姚

于鵠

鵠野田行云日沒出古城野田何茫茫寒孤上孤塚獵
火燒白楊昔人未爲泉下客若到此中還斷腸

題隣居云僻巷隣家少茅簷喜並居蒸梨常共甑澆薤
亦同渠傳屐朝尋藥分燈夜讀書雖然在城市還得似
樵漁

寄盧儼員外秋衣詞云寄遠惟以心心誠亦難知篋中
有秋帛裁成遠客衣蓬製雖女工尺度手自持容貌當
目中長短不復疑針縫密且堅遊客作塵縞意欲都無
言澣濯耐歲時殷勤託行人傳語慎勿遺別來年已老
亦聞鬢成絲縱然更相逢握手唯是悲所寄莫復棄願

見常相思

買山吟云買得幽山入漢陽槿籬踈處種枕柳唯有彌
猴來往熟弄人拋果滿書堂

山中寄樊尚書云却憶東溪日同袍是魯儒僧房閑共
宿酒肆醉相扶江上雙旌貴山中病客孤無媒還有計
春谷種桑榆

鵠大曆貞元間詩人也爲諸府從事居江湖間有卜居
漢陽及荆南陪樊尚書賞花詩其自述曰三十無名客
空山獨卧秋豈以詩窮者耶老人看花猶未足松江正
遇一枝紅日斜人散東風急吹向誰家明月中

襄陽席上作

送死多於生幾人得終老句右張爲取主客圖

張籍傷鵠詩云野性踈時俗甫命乃從軍氣高終不合
去如鏡上塵

鵠送客遊邊云若到并州北誰人不憶家寒深無去伴
路盡有平沙磧冷唯逢鴈天春不見花莫隨邊將意垂
老事輕車

江南曲云偶向江邊採白蘋還隨女伴賽江神衆中不
敢分明語暗擲金錢卜遠人韋莊取爲又玄集

張籍贈王建云于今去後交遊少東野已來篋笥貧賴
有白頭王建在眼前猶是詠詩人

王季文

季文字宗素池陽人少厭名利居九華遇異人授九仙
飛化之術曰子當先決科於詞籍後策名於真列冥注
使然不可移也登咸通中進士第授秘書郎尋謝病歸
九華日一浴於山之龍潭寒暑不渝

季文九華山謠云九華崢嶸占南陸蓮花擢本山半腹
翠屏橫截萬里天瀑水落深千丈玉雲梯石磴入杳冥
俯看四極如中庭丹崖壓下廬霍勢白日隱出斗斗星
杉松一歲抽數尺瓊草黃緣秀層壁南風拂曉煙霧開
滿山葱蒨鋪鮮碧雷霆往往從地發龍卧豹藏安可別

峻極遙看戛昊蒼
挺生豈得無才傑
神仙憚險莫敢登
馭風駕鶴循丘陵
陽鳥不見峯頂樹
大火尚結晶中外
靈光爽氣曛復旭
晴天倒影西墜淥
具區彭蠡夾兩傍
正可別作一嶽當少陽

唐詩紀事卷第二十九

